

Headlines

1. संसद दे दौनें सदनें च बक्ख-बक्ख मुद्दे गी लेई कार्रवाई केई बारी स्थगित होई।
2. प्रधानमंत्री नरेंद्र मोदी होरें युवाएं गी आखेआ जे ओहू राजनीति च शामिल होन ते मुख्य दे विकास च योगदान देन।
3. सुरक्षाबलें श्रीनगर बारामूला राश्ट्रीय जरनैली शिड़क पर बारामूला कश इक आई.ई.डी दा पता लाइए उसी नकारा करी दित्ता।
4. कब्जा रेखा कन्नै लगदे इलाके च नशा तस्करी च शामिल 5 जनें गी गिरफ्तार कीता गेआ।

<><><><><><>

Parliament-Adjournment

संसद दे दौनें सदनें दी कार्रवाई बक्ख-बक्ख मुद्दे गी लेइए केई बारी स्थगित होई। इनें मुद्दे च इक प्रमुख कारोबारी समूह पर कथित तौर पर रिश्तत लैने दे आरोप ते अमरीका आधारित इक प्रमुख फाउंडेशन कन्नै कांग्रेस नेताएं दे कथित संपर्क दे मुद्दे शामिल हे। पैहले स्थगन मगरा जिसले लोकसा दी कार्रवाई दपैहरी परतिए शुरू होई तां शोर-शराबा होन लगी पेआ। कांग्रेस दे सांसद सदन दे बिच्च बश्कार आई गए ते नारेबाजी करन लगी पेया। अध्यक्ष होरें सदन दी कार्यवाही चलन देने दा आग्रह विरोध करा'रदे सदस्ये थ्वां कीता। इस हंगामे दे चलदे सदन दी कार्रवाई दपैहरी 2 बजे तगर लेई स्थगित करी दित्ती गेई। राज्यसभा दे चेयरमैन जगदीप धनखड़ होरें आखेआ जे सदन दी कार्रवाई चलाना संभव नेई ऐ की जे सदन व्यवस्थित नेई ऐ। उनें कार्रवाई दपैहरी 2 बजे तगर स्थगित करी दित्ती। सदन दे नेता जे. पी नड्डा होरें आखेआ जे सत्ता पक्ष सदन गी चलाना चाहंदा ऐ ते शून्य काल दौरान चर्चा होनी लोड़चदी। उनें विपक्षी दले पर अपनी सुविधा मूजब अपना रूख बदलने दा आरोप लाया।

<><><><><><>

PM-Ahmedabad

प्रधानमंत्री नरेंद्र मोदी होरें आखेआ ऐ जे समां आई गेदा ऐ जे युवा वर्ग गी राजनीति च शामिल होइए मुख्य दी तरक्की च योगदान देना लोड़चदा ऐ तां जे 2047 तककर इक्क विकसित भारत दे नजरिये गी अमलीजामा पोआया जाई सकै। रामकृष्ण मठ अहमदाबाद पाससेआ आयोजित इक कार्यक्रम च बोलदे होई प्रधानमंत्री होरें आखेआ जे मुख्य गी अपने युवाएं गी राजनीति समेत

अर्थ बवस्था दे हरेक शोबे च नेतृत्व करने आस्तै तैयार करना लोड़चदा ऐ। प्रधानमंत्री होरें आध्यात्मिकता ते टिकाऊपन दे दरम्यान बरोबरी आह्ला संतुलन बनाने लेई जोर पाय तां जे इक्क बेहतर मानवता दा निर्माण कीता जाई सकै। प्रधानमंत्री होरें समाज दे उत्थान लेई संतें दे योगदान उप्पर लौऽ पाई। प्रधानमंत्री होरें राम कृष्ण मिशन आसेआ मुल्खे दी तरक्की आस्तै दित्ते गेदे योगदान दी सराहना कीती।

<><><><><><>

IED-Detected

सुरक्षाबलें अज्ज बडुलै उत्तर कश्मीर दे बारामूला जिले दे पलहल्लनद पट्टन इलाके च श्रीनगर बारामूला राश्ट्रीय जरनैली शिड़कै दे कन्नै-कन्नै इक आई.ई.डी दा पता लाया ते उसी नकारा करी दित्ता। इस आई.ई.डी गी श्रीनगर बारामूला जरनैली शिड़क दे कन्नै-कन्नै पट्टन इलाके दे पलपोरा पलहल्लन च लारया गेदा हा। उनें दस्सेआ ऐ जे आई.ई.डी गी 29 आर.आर रोड ओपनिंग पार्टी ते पट्टन दी पुलस नै दिक्खेआ हा जेदे मगरा बम्ब नकारा करने आहले दस्ते गी सद्देआ गेआ। उनें आखेआ जे एहतियात दे तौर उप्पर ट्रैफिक गी रोकी दित्ता गेदा हा। आई.ई.डी गी नकारा करने दे मगरा दौनें पाससें लेई गड्डियें दी आओजाई गी परतियै ब्हाल करी दित्ता गेआ। उआं पुलस नै इस मामले गी अपने हत्थ च लैता ऐ ते इस सरबन्धै च जांच शुरू करी दित्ती गेई ऐ।

<><><><><><>

Jammu SIH

औंदी 11 दिसम्बर थमां आयोजित कीते जा करदे स्मार्ट इंडिया हैकाथॉन 2024 दे साफ्टवेयर संस्करण दी मेजबानी लेई आईआईटी जम्मू पूरी चाल्ली तैयार ऐ। मुल्ख भरै थमां 30 टीमां, इस दरान साईबर सुरक्षा सरबन्धी बड़ी मती महत्वपूर्ण चुनौतिएं दा नबेडा करने लेई आपूं-चै मुकाबला करडन। आकाशवाणी दे जम्मू संवाददाता दी रिपोर्ट मूजब, आईआईटी जम्मू थमां त्रै टीमां कर्नाटक, दिल्ली ते गुवाहाटी जाइयै अपने-अपने सरबन्धत नोडल केन्द्रें च आईआईटी जम्मू दी नुमाइंदगी करडन। इस राश्ट्रव्यापी पैहलकदमी दा एहू 7मां संस्करण ऐ जेहदा आयोजन शिक्षा मंत्रालय आसेआ कीता जा करदा ऐ। केन्द्री शिक्षा मंत्री धर्मेन्द्र प्रधान होर वर्चअल ढंगै कन्नै एहदा उद्घाटन करडन। मुल्ख भरै च इस कार्यक्रम लेई 51 नोडल केन्द्र बनाए गेदे न।

<><><><><><>

ACB-Udhampur

अंतरराष्ट्रीय भ्रष्टाचार रोधी ध्याडे दे मौके पर उधमपुर दे जागते दे डिग्री कॉलेज च भ्रष्टाचार रोधी ब्यूरो आसेआ इक कार्यक्रम दा आयेजन कीता गेआ। इस मौके पर भ्रष्टाचार रोधी ब्यूरो दे उधमपुर रियासी रेंज दे एसएसपी मुहम्मद राशिद बट्ट होर मुख् परौहने हे। कॉलेज दे तकरीबन 200 विद्यार्थियों इस कार्यक्रम च हिस्सा लैता जेदे च उनेंगी बक्ख-बक्ख गेस्ट लैक्चरें ते पी.पी.टी-एं राहें भ्रष्टाचार बारै जागरूक कीता गेआ।

<><><><><><>

LG-Sinha

लेफ्टिनेंट गवर्नर मनोज सिन्हा होरें अज्ज राजभवन च श्री कैलख ज्योतिश ते वैदिक संस्थान ट्रस्ट आसेआ प्रकाशित वार्षिक पत्रिका कर्तव्य मार्ग दा त्रीया संस्करण जारी कीता। लेफ्टिनेंट गवर्नर होरें संपादक ते प्रकाश कन्नै जुडे दे हर इक माह्नु गी बधाई ते शुभकामनां दित्तियां न। उनें जम्मू-कश्मीर च संस्कृत गी बढावा देने ते प्राचीन ज्ञान प्रणाली पर शोध लेई उच्चे स्तर दा बनाने लेई श्री कैलख ज्योतिश ते वैदिक संस्थान ट्रस्ट दे सब्बनें सदस्यें दे जत्तें दी सराहना कीती। श्री कैलख ज्योतिश ते वैदिक संस्थान ट्रस्ट दे अध्यक्ष महंत रोहित शास्त्री हुंदे आसेआ संपादित इस प्रकाशन च मशहूर संस्कृत विद्वानें ते युवा शोधकर्ताएं दे शोध पत्रें दी मती गिनतरी ऐ।

<><><><><><>

Arrest Poonch

पुंछ जिले आहली नियंत्रण रेखा कोल चलाए गेदे इक तपाशी अभियान दौरान कथित तौरा उप्पर नशा तस्करी च शामिल 5 जनें गी अज्ज फगड़ी लैता गेआ। एहू तपाशी अभियान नियंत्रण रेखा दे अगेत्रे इलाकें च नशा तस्करी चलने दी पुख्ता जानकारी थोने मगरा चला गेआ हा। पुलस नै खारी, अजोत, देगवार, पुरानी, पुंछ ते जरनैली मोहल्ला च घेराबंदी कीती जेदे परैंत मौके उप्पर 5 जनें जेडे कथित तौरा उप्पर नशा तस्करी च शामिल हे, गी पुच्छताछ लेई हिरासत च लेई लैता गेआ।

<><><><><><>

Kathua-Protest

संत समाज जूना अखाड़ा महामंत्री मोहन गिरी हुंदी अगुवाई च सियासी ते समाजी संगठनें बंगलादेश सरकार ते संयुक्त राष्ट्र संगठनें दे खलाफ कठुआ च बरोध प्रदर्शन कीता कीजे उंदा आरोप ऐ जे एहू एजेंसियां बंगलादेश च रौहने आहले अल्पसंख्यक हिंदू समाज गी बचाने च नाकाम रेहियां न। प्रदर्शन मार्च कठुआ दे मुखर्जी चौक थमां शुरू होआ ते शहीदी चौक जाइयै सम्पन्न होआ। इस बरोध प्रदर्शन च लोके बंगलादेश दे हिंदुएं कन्नै इकजुटता आहले बैनर फड़े दे हे।

<><><><><><>

FM-NABARD

केंद्र नै अज्ज आखेआ ऐ जे नाबार्ड जन जातीय क्षेत्रे दे विकास आस्तै माली सहायता देआ रदा ऐ ते पिछले 18 बरें च इक ज्हार 29 परियोजनाएं गी मंजूरी दिती गई ऐ। लोकसभा च इक सौआले दे लिखित परते च खजाना मंत्री निर्मला सीतारमण होरें दस्सेआ जे इनें परियोजनाएं दा मकसद जनजातीय परौआरें गी स्थाई आजीविका दे मौके प्रदान करना ऐ। उनें दस्सेआ जे एहू योजना 2005-06 च शुरू कीती गई ही ते तदूं थ्वां 6 लक्ख 29 ज्हार परौआरें गी एहूदे थ्वां लाहू थ्होआ ऐ। उनें आखेआ जे पूरे मुलखे च जनजातीय विकास कार्यक्रम राएं करीब 2 करोड़ 90 लक्ख बूहटे लाए गए न।

<><><><><><>

LS-Agri Loans

केंद्र नै आखेआ ऐ जे मुलख च लौहके ते हाशिए पर रौहने आहले करसानें आस्तै राई-बाई सरबंधी दोहार लगातार बदा रदा ऐ। लोकसभा च इक सौआलै दे लिखित परते च खजाना मंत्री निर्मला सीतारमण होरें आखेआ जे पिछले त्रै बरे च लौहके ते हाशिए आहले करसानें दे कृषि दोहार खातें दी गिनतरी 2023-24 च 13 अशारिया 6 करोड़ होई गई ऐ। मंत्री होरें दस्सेआ जे 2021-22 च एहू 11 अशारिया 67 करोड़ ते 2022-23 च 12 अशारिया 38 करोड़ ही।

<><><><><><>

Rajnath-INS Tushil

रक्षा मंत्री राजनाथ सिंह होर रूस च आई.एन.एस तुशील गी भारती नौसेना च शामिल कराडन। इस मौके पर नौसेना दे अध्यक्ष एडमिरल दिनेश के त्रिपाठी होर बी मौजूद होडन। रक्षा मंत्री राजनाथ सिंह होर त्रऊं दिनें लेई जंदी रातीं मास्को पुज्जे हे। राजनाथ सिंह ते रूस दे रक्षा मंत्री Andrey Belousov होर कल फौजी ते तकनीकी साथ-सहयोग बारे भारत रूस अंतर सरकारी कमीशन दी 21मीं बैठक दी सह अध्यक्षता करडन।